

**KUALA LANGAT, SEPANG**

HUBUNGI SIRIAD KUALA LANGAT / SEPANG: NURUL FIRDAUS KHAIRI - 019-6600920 / 019 660275 @

**Hormati keputusan Ahmad Yunus**

BANTING - Kenyataan Adun Sijangang, Datuk Dr Ahmad Yunus Haiari yang mahu melepaskan kerusi Dun Sijangang pada PRU akan datang dihormati.

Ketua Pemuda Umno Kuala Langat, Mohd Jefrizal Jaafar berkata, Umno atau BN tiada mengetahui hasrat beliau untuk menyerahkan kerusinya kepada orang lain.

Menurutnya, apa pun pilihannya menghormati apa jua keputusan beliau kerana sebagai tuan punya diri yang mengetahui kondisi diri sendiri.

"Sebagai wakil rakyat beliau tahu kemampuannya untuk sama ada terus berkhidmat atau berhenti memberikan khidmatnya dan seterusnya memberi laluan kepada muka baharu.

"Secara peribadi, mengenali beliau dan satu kampung dengannya kita akui beliau adalah se-



**Beliau tahu sama ada wajar terus berkhidmat atau berhenti."**  
- Mohd Jefrizal

orang pemimpin yang baik dan rendah diri, tetapi dengan cabaran kemahuan dan keperluan rakyat kita perlu seorang wakil yang bukan sekadar baik dan disenangi namun mampu bekerja kuat untuk membela nasib rakyat terutama cabaran hidup serba pantas dan tinggi ini," katanya kepada *Sinar Harian*.

Beliau berkata demikian ketika mengulas mengenai kenyataan Ahmad Yunus yang mahu melepaskan kerusinya.

Mohd Jefrizal berkata, berkenaan calon muda bergelar doktor sebagai tawaran Pas, Umno-BN tiada masalah

dan bersedia kerana tradisi Umno-BN adalah meletakkan calon-calon yang bukan sahaja berkualiti dari segi pendidikan namun memahami denyut nadi rakyat serta mampu bekerja keras demi memastikan nasib rakyat terbelah.

Katanya, sudah dua penggal Umno-BN menjadi pembangkang di Selangor dan khusus di Kuala Langat tetapi rekod menunjukkan bahawa Umno-BN tidak pernah gagal memberi khidmat kepada masyarakat dengan baik.

**Lebihkan integrasi dengan ahli parti**



Siok Hwa bersama sebahagian pemimpin masyarakat dan ahli Briged P112.

JENJAROM - Menjelang PRU14, kebanyakan pemimpin setempat terus mendekati rakyat dengan pelbagai cara demi memantapkan sokongan.

Bagaimanapun, bagi Ketua Wanita MCA Bahagian Kuala Langat, Ng Siok Hwa berkata, beliau berperanan lebihkan program untuk berinteraksi dengan ahli parti.

Menurutnya, melalui gerak kerja dengan ahli parti, perkembangan dalam masyarakat dapat diatur dengan baik tidak seperti dahulu melakukan gerak kerja secara rambang.

"Kali ini kita lebih fokus kepada ahli parti, segala program kita bersama dan kemudian kita boleh perluas aktiviti dari situ.

"Tak adalah macam dahulu kita buat kerja secara rambang, jadi kami lebih fokus kepada ahli parti," katanya kepada *Sinar Harian* ketika ditemui dalam Perasmian Jelajah

Singah dan Kemas Surau dan Masjid di Balai Raya Serbaguna Taman Sejahtera, Jenjarom anjuran Briged Gempur N52 Dun Banting dan N51 Dun Sijanggang.

Siok Hwa yang diumumkan bakal calon Dun Banting oleh kepimpinan bahagian MCA Bahagian Kuala Langat memberitahu harapan untuk menang di Dun itu memang ada.

Katanya, beliau yakin peratusan pengundi boleh meningkat mencecah sehingga 30 peratus berbanding pada PRU yang lalu.

"Maklumlah, jika orang tua lama-lama akan terongkar. Dalam situasi hari kita nak cakup penyokong hardcore (tegar) tak boleh juga... sebab masih lagi tanda tanya, bagi saya undi itu rahsia.

"Kita kena tunggu keputusan keluar baru boleh percaya siapa yang menang haki rakyat," katanya.

**Dua kawasan baharu kes denggi**

**Taman Baiduri dan Taman Sari kawasan yang aktif**

NURUL FIRDAUS KHAIRI

BANTING

Pegawai Kesihatan Daerah Kuala Langat mengenalpasti dua kawasan baharu melibatkan kes denggi yang perlu ditangani segera.

Pegawai Kesihatan Daerah Kuala Langat, Dr Wan Ahmad Razman Wan Abdul Salim berkata, dua kawasan itu adalah di Taman Baiduri dan Taman Sari yang menunjukkan kawasan aktif denggi.

Menurutnya, pada tahun ini sahaja sebanyak 250 kes yang dilaporkan sehingga pihaknya terpaksa mengadakan beberapa siri pemantauan bagi mengelakkan pembiakan nyamuk Aedes berlaku.



Sebahagian penduduk yang terlibat dalam aktiviti pencegahan nyamuk Aedes.

"Kita dapati kawasan baharu ini wujud disebabkan persekitaran rumah penduduk terdapat pembiakan nyamuk Aedes termasuk kempen jumpai bekas-bekas yang boleh menyebabkan pembiakan nyamuk Aedes berlaku.

"Penduduk disaran memainkan peranan untuk mencegah denggi secara berterusan dan sekiranya mengalami demam panas juga diarahkan mendapat rawatan awal

bagi mengelakkan kematian dan mencegah penularan penyakit demam denggi," katanya kepada pemberita mengulas mengenai kempen kesedaran mengenai bahaya penyakit demam yang dijalankan serentak di daerah Kuala Langat, semalam.

Wan Ahmad berkata, kempen itu melibatkan 26 kawasan lokaliti yang disertai oleh ahli cembil, kawasan rukun tetangga, pen-

duduk, sukarelawan, persatuan penduduk, ahli majlis, ketua kampung dan komuniti setempat.

Katanya, kempen itu bertujuan untuk menyedarkan masyarakat tentang bahaya penyakit demam denggi serta langkah-langkah yang perlu diambil oleh semua penduduk dalam mencegah dan mengawal penyakit demam denggi daripada berlaku dan merebak.

"Kes demam denggi yang di-

**info** • 250 kes yang dicatatkan tahun ini, terpaksa perbanyakkan pemantauan untuk elak pembiakan Aedes

laporkan di daerah Kuala Langat agak tinggi dan membimbangkan.

"Peranan semua pihak terutama penduduk sendiri sangat diperlukan untuk sama-sama membantu menangani isu denggi dan kenyataan bahawa kawalan denggi hanya dilakukan oleh pihak pejabat kesihatan dan Pihak Berkuasa Tempatan (PBT) sahaja tidak benar dan perlu diubah," katanya.

Beliau berkata, kes denggi yang berlaku kebanyakannya berpunca dari rumah penduduk yang kurang diberi kerjasama kepada petugas anggota kesihatan apabila melakukan pemeriksaan ke rumah dan "fogging".

Dalam kempen tersebut, pihaknya turut mempromosikan kempen supaya setiap penduduk dapat menghabiskan masa 10 minit untuk melakukan pembersihan di rumah.